



Diabierna 17 Februari 2023

Email: IslaOnline@gobierno.aw Tel: 528-4952




 **ISLA**ONLINE

Noticia di Gobierno

2023





PROME MINISTER, MINISTER GLENBERT CROES Y PROFESIONALNAN A REUNI CU REPRESENTANTE UNDP

“E agencia di Nacionnan Uni a bin na un forma proactivo y constructivo pa yuda nos atende retonan”

Representante di United Nations Development Program (UNDP), señor Gerardo Noto ta na Aruba pa diferente Proyecto. Diamars 7 di februari, Prome Minister Evelyn Wever-Croes hunto cu Minister Glenbert Croes y profesionalnan, señora Jocelyne Croes, señor Ton Royer y señora Ester Arensman a reuni cu ne pa elabora riba e plannan cu Aruba tin riba e tereno di energia y riba e transicion di energia di fuel pa energia mas limpi y tambe kico ta e plannan cu Gobierno ta ehecutando pa proteha Aruba y prepara Aruba pa cambio climatico pa loke ta trata nos infraestructura. UNDP ta yuda paisnan manera Aruba riba ambos tereno pa traha nos plannan y nos proyectonan y yuda nos yega na fondo pa esaki.



Di parti di energia, Aruba tin un National Energy Policy cu ta e maneho y vision di Gobierno di Aruba y di henter Aruba cu ta indica unda pa cana pa nos por cumpli cu e tratadonan di Paris pa 2050 pero principalmente pa nos stop di uza tanto HFO cu ta e fuel cu ta causa asina hopi daño na nos medio ambiente.

E plannan aki ya ta den ehecucion pero UNDP por yuda nos acelera e implementacion di e plan aki y mira unda nos tin cu bay enfoca mas. Por ehempel e uzo di HFO na WEB pa genera coriente y awa cu ta hopi importante pero tambe nos sector di transporte, nos busnan y autonan. Den cuadro aki, a papia di autonan electrico cu ta un alternativa y con por yega pa tin mas auto electrico na Aruba.

Di otro banda, hunto cu DOW, a papia tambe di kico ta tur e plannan cu ta ehecutando pa mitiga e efectonan di cambio

climatico. Nos careteranan di asphalt ta den hopi mal condicion, esaki parcialmente tin di haber cu no por a inverti debi na e pandemia pasobra mester a uza e placa pan salba bida di hende pero parcialmente tambe cu awa ta yobiendo mas frecuentemente na Aruba cu tin un impacto riba nos careteranan

“Esaki ta e parti di e cambio climatico cu tin su efecto riba nos infraestructura. Hunto cu DOW, nos ta trahando un plan integral kico tur nos mester haci pa nos mehora e calidad di nos careteranan. Nos ta preparando nos plan y hunto cu UNDP nos lo busca financiamiento pa esaki pa nos percura pa nos careteranan y edificionan, special edificio di Gobierno por cu tur e cambio climatico aki cu ta spera nos.

E tabata un bon reunion y un biaha mas nos a mira cu e agencianan aki di Nacionnan Uni a bin na un forma proactivo y constructivo pa yuda nos pa atende cu tur e retonan cu nos ta atende cu ne”, Prome Minister Evelyn Wever-Croes a expresa.




PRESENTACION DI PROYECTO GAYEWAY 2030 NA AAA

Diahuebs atardi Minister di Turismo Sr. Dangui Oduber bou invitacion di CEO di Aruba Airport Authority sr. Joost Meijs a bay na e Project Management Office pa un bishita priva. Aki e mandatario por mira e avancen cu a wordo hasi te cu awo na e proyecto di Gateway 2030. E CEO di AAA Joost Meijs a compaña Minister Oduber durante e bishita aki conhuntamente cu demas lidernan di e proyecto. E bishita tabata den conexion cu e update di desaroyonan den e fase 1A di e proyecto di expansion di nos aeropuerto.

Gateway 2030 ta un proyecto di mas di 140 milyon dollar cu lo genera entre 200 y 300 cupo di trabou sea directo of indirecto cu AAA. E proyecto aki lo crea un spin off economico pa pais Aruba y lo trece placa den caha di Gobierno atraves di impuesto. Ta un proyecto importante pa e ampliacion y renobacion di nos aeropuerto. Minister Oduber a enfatisa cu e proyecto aki ta wordo ehecuta pa contratistanan local y mayoria di e materialnan di construccion ta wordo cumpra na Aruba mes. Segun planificacion e proyecto aki lo mester wordo entrega na aña 2024, asina e madatario a trece dilanti.


E fase 1A ta consisti di e expansion di e check in hall pa pasaheronan cu ta biaha pa Merca. E expansion lo zorg pa e hall aki bira e main check in pa tur vuelo cu ta sali for di Aruba, pues esaki ta inclui esnan pa Merca y tambe e NON US departures. Ademá di esaki, e fase aki tambe ta inclui e instalacion di e systema cu ta handle cu maleta. E siguiente pasonan den e proyecto aki ta den proceso di evaluacion y ta inclui diferente lugar caminda por sinta y come y tambe mas facilidadnan den e parti di arrivals y departures na airport di Aruba.

Minister Oduber a duna di conoce tambe cu inicialmente e proyecto di Gateway 2030 tabata tin un inversion di 250 milyon dollar. Esaki naturalmente tabata prome cu e pandemia, e pandemia a cambia henter a panorama di e proyecto y awor e tin un inversion di 143 milyon dollar. Minister a splica cu mester a reprograma henter e proyecto y asina pone e proyecto



den diferente fase. Esaki no ta un proyecto facil, e tin hopi complejidad cune mirando cu e ta na un aeropuerto cu mester keda operacional na tur momento, e mandatario ta expresa.

Minister Dangui Oduber den nomber di Gobierno di Aruba a manda palabranan di gradicimento na tur stakeholder's pa nan trabou, compromiso y cooperacion pa cu e proyecto. Na final e mandatario a manda un danki special na tur e contratistanan y tambe na cada un di e trahadornan cu ta haci proyecto Gateway 2030 posibel. Aruba ta progresando y manera nos a bisa den campaña, nos pais lo prospera bek. Esaki ta e aña di union y positivismo.



NOS TA SIGUI TRAHA HUNTO PA MEHORA OPORTUNIDAD PA NOS STUDIAANTENAN



Recientemente, Minister di Enseñansa, Cultura y Ciencia di Hulanda, Robbert Dijkgraaf tabata na Aruba. Durante su estadia Minister Dijkgraaf tabatin diferente reunion y a bishita diferente scol e.o. Universidad di Aruba. Minister Endy Croes y miembro di Colegio di Supervision di Universidad di Aruba, Sr. Angelo Brete a yama Minister Dijkgraaf bonbini na Universidad di Aruba.



Despues, Prof. dr. Viola Heutger a duna e dignatario un tour di e scol. Den ora di atardi a sigui cu presentacion den e aula di Universidad di Aruba, unda cu e decanonan a presenta e status di nan facultad-, inscripcion-, exito- y retonan. Concluyendo Minister Endy Croes a expresa cu e tabata un atardi ameno y cu nos lo sigui traha hunto pa asina mehora y brinda mas oportunidad na nos studianten.



DELEGACION DI ARUBA ENCABESA PA MINISTER DI ENERGIA A RICIBI PRESENTACION DI E 'HYDROGEN VALLEY AIRPORT' NA HULANDA

Minister di Labor, Energia y Integracion Glenbert Croes conhuntamente cu Minister Plenipotenciario Ady Thijsen, Director di Utilities Toon Rojer, Director di RdA Renny Arends, Director di WEB Alfredo Koolman y Director Di Elmar Anthony Yrausquin, actualmente ta na Hulanda pa atende diferente reunionnan den cuadro di oportunidadnan pa desaroyo di hidrogeno pa Aruba

Despues cu a finalisa e prome dia di sesion, Minister Croes a elabora riba e reunion cu a tuma luga cu sr. Patrick Cnubben kende ta "Director of Hydrogen Strategy na New Energy Coalition". E delegacion di Aruba a ricibi un presentacion di e Hydrogen Valley cual tabata impresionante pa mira con avansa e mundo di hidrogeno ta na Groningen, Hulanda. A traves di e reunionnan a haya un bista di con Hulanda ta desaroyando su industria, e inversionanan cu e ta rekeri y e gran oportunidad cu e ta representa pa Aruba.

Minister Croes a splica cu "Nos kier habri e refineria a base di energia limpi pa e ta uno duradero y sostenibel y cu lo por adapta na tur cambio cu lo por bin den futuro pa asina e no cera mas." Pues kier mara e reactivacion di refineria na un plan di termino largo cual lo tin un rol grandi den e transicion energetico y implementacion di e Plan Nacional di Energia di Aruba. Un plan cu lo sigui crea cupo di tabou, entrada pa comercio, impacto positivo pa nos economia, mas industria pa nos pais y mas entrada pa gobierno.

E reunionnan lo continua, proximamente lo reunion cu e sector di waf y asina sigui cu diferente preparacion den cuadro di e cooperacion cu gobierno di Hulanda, cu e meta pa crea prosperidad pa Aruba y cu e vision pa e proyecto hidrogeno bira realidad. Minister Croes como Minister di Energia a termina bisando cu e ta sumamente contento cu e por contribui na e desaroyo positivo aki pa henter pueblo di Aruba.



CARGA RESPONSABILIDAD TA MAS IMPORTANTE CU TRATA DI SER UN HEROE.

PRESIDENTE DI UKRANIA PRESIDENTE VOLODIMIR ZELENSKY

Ora un ciudadano ta carga su responsabilidad, e por bira un heroe. Pero si e no carga su responsabilidad, e no por bira un heroe. Cada un ciudadano tin un responsabilidad di carga pa hiba nos famia y nos pais padilanti. Algun tin un responsabilidad mas grandi cu otro. Pero echo ta cu nos tur mester carga nos responsabilidad. Ban sigui carga nos responsabilidad pa un Aruba integro. Nos no por pas'e pa nos futuro generacion. **Ban hunto, den union, y cu positivismo, nos carga nos responsabilidad.**



— AÑA DI UNION Y POSITIVISMO! —